



Komunikadu Imprensa

Períodu : *Maiu 2012*
Edisaun : *14 Maiu 2012*

Semináriu ba Estudante Universitáriu Feto: Enkoraza partisipasaun feto iha setór Judisiáriu Timor Leste

Iha fulan Maiu nia laran JSMP sei realiza semináriu iha universidade tolu, ne'ebé sei hahu husi UNNIL iha loron 12 Maiu, UNPAZ iha loron 19 Maiu no UNITAL iha loron 26 Maiu 2012. Programa ne'e realiza liu husi koperasaun mútual no kordenasaun diak ho ho Responsavel Dekanu sira ho JSMP. Semináriu ne'e realiza ba estudante Universiátriu Feto ho total partisipantes feto nain 60 iha kada Fakuldade de Direitu husi kada Universidade ida-idak. Semináriu ne'e ho tema "*Partisipasaun Feto hametin Igualidade Jéneru iha Estrutura Sistema Judisiáriu Timor Leste*."

Naradores ba semináriu ne'e kompostu husi autoridade judisiáriu maka hanesan Meritissima Dra. Jacinta Correia Juiz de Direitu Tribunál Distrital Dili no parte Ministériu Públiku Dignissima Dra. Remizia de Fatima da Silva nomos advogada ida husi Instituisaun Defensória Pública Timor Leste.

Semináriu ne'e ho objetivu atu enkoraza partisipasaun estudante feto hodi kompete iha Centru Formasaun Judisiáriu (CFJ) ba kareira majistradu no defensória públiku ka advogada privadu depois de remata sira nia estadu iha fakuldade de direitu. Idea ne'e ho espetativa ida katak iha tempu sira tuir mai sei iha balansau equilibru jenéru iha Sistema Judisiáriu Timor Leste.

Relasiona ho pontu objetivu hirak ne'e maka, semináriu ida ne'e dezeiña ho natureza limitadu ka uniku ba grupu estudante feto universitáriu sira. Tanbá ne'e semináriu ne'e sei hare no foka ba vijaun jerál papel Juiz, Ministériu Públiku no Defensor Públiku nian iha tribunál, dezafiu husi kada papel profesional iha setór justisa, motivasaun ruma ba opsaun atu hili kareira nu'udar Juiza, Prokuradora, no Defensor/advogada no karik valores priviléjiu (*nilai keistimewaan*) husi kada profesaun hirak ne'e, purzemplu hanesan Majistradu Juiza, Majistradu Ministeriu Públiku no Defensor Públiku.

Iha âmbito semináriu ida ne'e ho intensaun adisional atu disponivel ka fo fatin ne'ebé seguru no konfortavel liu ba estudante feto sira atu rona no buka hatene papel profesióal husi funsaun kareriál hirak ne'e.

Antes ne'e JSMP, iha tinan 2010 no 2011, liu husi apoiu husi Norwegian Embassy Jakarta, realiza ona atividade semináriu loron sorin, iha universidade sira iha Timor Leste ho tema oi-oin, maibe nafatin iha relasaun asuntu jender no asesu ba justisa.

Bázeia ba esperiensa JSMP nian hatudu katak, durante atividade hirak ne'ebé involve mos partisipante estudante universitáriu mane sira, estudante feto sira, la hetan oportunidade naton atu hato'o pergunta ka espresa sira nia hanoin durante sesaun husu no hatan nian. Tanbá ne'e, liu husi konsultasaun no aprovasaun husi Responsavel Dekanu sira, JSMP hanoin katak semináriu ne'e presiza maneija atu foka deit ba grupu estudante feto nune'e sei fornese oportunidade no ambiente ne'ebé konfortavel liu ba sira atu partisipa.

Programa semináriu ne'e realiza tanbá hetan apoiu finanseiru husi Royal Norwegian Embassy iha Jakarta-Indonézia.

Atu hetan informasaun kompleitu,

Luis de Oliveira Sampaio

Diretór Ezekutivu JSMP

Kontaktu: 3323883/7295795

Email, luis@jsmp.minihub.org